

BON COMENTARIO DI E SONIDO DURANTE TUMBA CONTEST..

****** Hopi bon comentario DEN AMBIENTE a ricibi tocante e sonido tremendo durante festival di Tumba. DEN AMBIENTE ta manda palabranan di PABIEN, na CRYSTAL SOUND & LIGHTING, pa nan magnifo trabao realiza. Ora di critica ta critica, y ora di elogia tambe tin cu duna su credito merecido, debi cu sonido ta forma parti esencial y importante durante cualkier festival. Ta spera cu e problema di sonido lo ta algo di olvido, ya cu poco poco ARUBA ta demostrando e nivel y calidad cu ta ser exige pa un evento di tal magnitud. Esaki a ser demostra diasabra ultimo..



****** Giovanni Atalita musico/periodista naci na ARUBA, kende a studia na Berklee College of Music, y actualmente ta formando parti di Arnell y Orquesta, tambe a forma parti di e brass seccion compañando Papito cu su Tumba triunfador "Hala pa nos pasa". Porcierto Giovanni ta hefe di redaccion di La Prensa, y ta promoviendo nos 'artistanan local engrande den su columna farandulero MUSICA & ESPECTACULO..



****** Fio Wester talentoso percusionista cominando e ritmo musical cu e areglista Arnell Salsbach. Porcierto cu Fio Wester durante festival di Tumba na Corsow, a compaña riba timbal e Rey di Tumba Ike Jesurun y tur e demas finalistanan como homenaje na e saliente Rey di Tumba hunto cu Doble R. S.S.S..

UN ELOGIO NA SU LUGAR PA E REINA DI COASTAL MICHELLA LACLE...



****** DEN AMBIENTE no por keda sin duna un elogio grandi na e simpatica beyesa Michella Lacle, kende actualmente ta Coastal Queen 1995, y pa otro siman lo bay representa Coastal Club den e grandioso eleccion di Aruba su di 41 Reina di Carnaval.


E motibo cu Michella Lacle merece tur clase di respet y merito, ta cu e la demostra den varios ocasion cu e ta un digna representante den cualkier certamen di belleza. DEN AMBIENTE tabatin e honor di a conoce Michella durante su participacion den Miss Teen Aruba 1992, y por bisa cu Michella tabata un fuerte candidata.

Loke ta resalta di Michella ta su carisma natural, cual bo por nota na su sonrisa agradable. Tambe Michella ta dispone di un caracter cu hopi CALIDAD HUMANO. Den hopi ocasion Michella a sa di

cumpli cu tur su compromisonan, apesar cu e tabata sumamente ocupa, tog e tabata sa di complace cu tur su compromiso den un forma suave, cariñoso y semper Michella tabata PUNTUAL na e orario programa.

Durante e BINGO GRANDI ultimo den Tropicana showroom, Michella tabata invitado di honor, y e la sa cu su sonrisa agradable di capta atencion di UN I TUR den sala cu aplausonan fuerte. E bunita aceptacion aki di un publico no ta tur ora ta e caso aki na Aruba. Esaki caba a proba cu Michella ta un beyesa riba su mes, y cu aunke e no logra di conquista e corona di nos Reina di Carnaval, DEN AMBIENTE ta recomenda su persona pa bay "ALL THE WAY" pa e titulo di MISS ARUBA, ya cu MICHELLA tin tur e cualidadnan pa ser un DIGNA REPRESENTANTE DI NOS DUSHI PAIS!

GRUPO EGYPTO DEN CARNAVAL AINDA TIN LUGAR..



****** E grupo di carnaval "EGYPTO DEN CARNAVAL" di San Nicolas, ainda tin lugar pa esnan cu kier diverti nan mes y pasa un experiencia sumamente dushi den e parada unico di San Nicolas.

E prijs ta solamente 200 Florin, cual ta inclui tur cos di A te Z. Por tuma contacto personalmente na Weg Sero Blanco 21 A, of yama tel: 46673 y puntra pa e dinamico

caballero Shon Pe despues di 7or di anochi.

Riba grafico por aprecia e trahenan carnavalesco sumamente colorido y comodo ala estilo EGYPTO.. Ata oportunidad pa bo goza y pasa un dushi experiencia inolvidable durante e super carnaval di San Nicolas, na unda semper TRANQUILIDAD y AMBIENTE ta resalta..